

U Piccia fôcu

Au sgiò Paulu Graziani

Maladì vògliu l'umacciu
Chi d'estate, tutti l'anni,
Quandu, asciuttu è lu terrenu
Cunsuntu da la sicchia,
Quandu la legna incastòla
E s'incrustedu l'umbria,
Senza teme li devasti,
Senza misurà li danni,
Zinga fôcu a li macchjoni,
Brusgia a Cirnu, indi so panni,
Di la Terra di bellezza
Ne face una desertia!

Alta vindetta ne tiri
Lu Figliòlu di Maria!

O mostru, di vive indegnu,
Occhju e còre d'assassinu,
Chi furore ti divora?
Ma chi strana frenesia
Di sempre scatinà fiare
Per biscòce cio chi cria:
L'erbigliòla e la filetta
L'arbitru, l'alzu e lu pinu
L'oliva cu lu castagnu
La pambana tira-vinu!
Chi tu secchi cume d'elli
E vada a la malavia!

O mostru, di vive indegnu
Occhju e còre d'assassinu!

Ma l'un ti tremma la manu?
Ma l'un ti casca lu fiatu?
L'un senti di la cusenza
Lu punzicume tenace
Quandu, per impiccià l'esca,
Battieghj lu fucace
Fumichente, l'ingutuppi
In un pallon di cagatu
E la lenti, sottu frasca,
Tra lu casciciu allibratu
Per ch'ella covi tre ghjorni,
Pò imburi la furnace?

Ma l'un ti tremma la manu
Ma l'un ti casca lu fiatu?

Scappa, in fretta, da lu lòcu,
E più l'un voltà spallera!
Trasalta li fuminali
E sbirba di li cunfini!
Ch'ell'un ti scopri lu falcu
Chi nisunu ti sculini
E dica: è statu lu tale!
Cunnoscu la so cimbrera!
Fate corre la justizia,
E schiaffatelu in galera!
Ch'ellu trascinga, in Cajena,
L'annelli cu li pindini!

Scappa, in fretta, da lu lòcu
E più l'un volta spallera!

Lava puru le to mane
E strufinale, ò pastore,
A l'acqua di le surgente
Ciotta e netta la to faccia!
La tacca chi t'hai addossu,
Un c'è aqua chi la caccia:
Tacca di sangue e difôcu
Ne s'intarra ne si mòre!
O chi delittu è lu tòiu,
Per quattru fili d'arbaccia:
Polzi la pianta innucente
E la fera ch'ella ammachja
L'alburu, cu la so fronda,
Lu so fruttu e luso fiore?

Lava puru le to mane
E strufinale, ò pastore!

Or, sentimi, un fà lu tontu
Unn'accende fuginella!
La fiara, a lingua tirata,
Unn'aspetta ca lu ventu
Per vulà di vanga in vanga
E fà rasu struggimentu!
Brusgià lu riccu e lu corciu
Tutti basgia à cicherella!
Ne rispara la capanna,
Ne l'anticu casamentu,
Ne lu nidu di l'acellu
Cu li piugonelli rentu,
Ne le trecce, ne lu voltu
Di l'orfana Cìneella!

Or, sentimi, un fà lu tontu.
Unn'accende fuginella!

O Còrsu, chi che tu sia,
Più l'un lascià fà dispettu,
A la Vergine chi piegne
La so sòrte addulurata!
Forse, l'un senti lu gridu
Chi trabocca ogni falata?
Forse l'un senti lu lagnu
Chi solleva lu so pettu:
« Chi faraghiu, ò la mio prede,
« Da tanti sò straziata,
« A chi mi taglia l'artigli,
« Chi mi brusgia la curata!
« S'ell'ha da durà cusine
« Mittitemi, in catalettu! »

O Còrsu, chi che tu sia,
Più l'un lascià fà dispettu!

Maladì vògliu l'umacciu,
Chi, d'estate, tutti l'anni,
Quandu, asciuttu è lu terrenu,
Cunsuntu da la sicchia,
Quandu, la legna incastòla,
E s'incrustedu l'ombria
Senza teme li devasti,
Senza misurà li danni
Zinga fôcu a li macchjoni,
Brusgia a Cirnu, ind'i so panni,
Di la Terra di bellezze
Ne face una desertia!

Alta vindetta ne tiri
Lu Figliòlu di Maria!

Martinu Appinzapalu.